

誠齋詩集

冊四



楊文節公詩集卷之十八

宋吉水楊萬里廷秀甫著

長陽後學彭淑秋潭甫校訂

本邑後學趙本漢漱雲甫同校

南海集

曉發黃巢磯芭蕉林中

清遠山前煙雨濛黃巢磯畔水連空旋芟蘆荻炊朝飯更斫芭蕉補漏篷

水落二絕句

桑椹垂紅似荔枝荻芽如臂與人齊夜來水落知深淺看取芭蕉五尺泥
輕寒瑟瑟入船中閉却船門下却篷要得新晴江水落不應更恨打頭風

蝨戶

天公分付水生涯從小教他踏浪花煮蟹當糧那識米緝蕉爲布不須紗夜來
春漲吞沙觜急遣兒童斫荻芽自笑平生老行路銀山堆裏正浮家

回望黃巢磯之險心悸久之

夜雲到曉不教收
初日微明又却休
雨爲岸花新洗面
水撩江草欲搖頭
千篙百棹力都盡
十里九磯船正愁
若到峽中應更險
却思峽外是安流

入峽歌

峽山未到日日愁
峽山已到愁却休
不是朝來愁便散
愁殺人來山不管
昨宵遠望最高尖
今朝近看雲隔簾
樓船衝雨過山下
兩扇屏風五色畫
江神不遣客心驚
雲去雲來遮巖局
忽然褰雲露山脚
仰見千丈翠玉削
篙師相賀漲痕落
今夕可到鷗磯泊

峽山寺竹枝詞五首

峽裏撐船更不行
櫂郎相語改行程
却從西岸拋東岸
依舊船頭不可撐
一水雙崖千萬縈
有天無地只心驚
無人打殺杜鵑子
兩外飛來頭上聲
龜魚到此總回頭
不但龜魚蟹亦愁
底事詩人輕老命
犯灘衝石去韶州
一灘過了一灘奔
一石橫來一石蹲
若怨古來天設險
峽山不到也由君
天齊浪自說浯溪
峽與天齊真箇齊
未必峽山高爾許
看來只恐是天低

峽中得風掛帆

樓船上水不寸步兩山慘慘愁將暮一聲霹靂天欲雨隔江草樹忽起舞風從
海南天外來怒吹峽山山倒開百夫絕叫椎大鼓一夫飛上千尺桅布帆掛了
却袖手坐看水上鵝毛走

夜泊鷓鴣磯

峽中盡日沒人煙船泊鷓鴣磯也有村已被子規酸骨死今宵第一莫啼猿

過顯濟廟前竹枝詞并石磯二首

石磯作意惱舟人東起波濤遣怒奔撐折萬篙渾不住石磯贏得萬餘痕
大磯愁似小磯愁篙稍寬時船卽流撐得篙頭都是血一磯又復在前頭

泊光口

風平浪靜不生紋水面渾如鏡面新忽有暗流江底出滾翻水面作車輪

過虎頭磯

虎臥中流扼兩涯目光鬚怒首仍回真陽峽裏君須記箇是瞿塘灘頭堆

真陽峽

清遠雖佳未足觀
真陽佳絕冠南蠻
一泉嶺背懸崖出
亂洒江邊怪石間
夾岸對排雙玉笋
此峯外面萬青山
險艱去處多奇觀
自古何人愛險艱

夜泊英州

旅病情先惡
愁眠夢更驚
犬須終夕吠
月到五更明
未解波頭意
偏來枕底聲
平生厭行路
投老正追程

阻風鍾家村觀岸旁物化二首

水蟲纔出綠波來
細看爬沙上石崖
化作蜻蜓忽飛去
幾時飛去却飛回
殷如蟬蛻濕仍新
那復浮嬉浪底春
却把今身飛照水
不知石上是前身

題鍾家村石崖二首

莫愛懸崖萬丈高
只工險峭作風濤
看來一一生窠眼
解與行人着過篙
水與高崖有底冤
相逢不得正相喧
若教漁父頭無笠
只着蓑衣便是猿

阻風泊鍾家村離英州已三日纔行二十里二首

南遊端爲看山來過眼匆匆首屢回不是阻風船不進何緣看盡萬崔嵬
滿船兒女厭江行我愛江行怕入城慚愧風師教款曲爲分一舍作三程

檄風伯

峭壁呀呀虎擘口惡灘洶洶雷出吼沚流更着打頭風如撐鉄船上牛斗風伯
勸爾一杯酒何須惡劇驚詩叟端能爲我霽威否岸柳掉頭荻搖手

嶺雲

好山幸自綠嶄嶄須把輕雲護淺嵐天女似憐山骨瘦爲縫霧縠作春衫

明發陳公徑過摩舍那灘石峯下八首

遙松煙未消近竹露猶滴石峯矜孤銳喜以江自隔清潭涵曦紫碧岫過雲白
回瞻宿處堤路轉不可覓地迴人絕影山僻虎留跡下有無底潭上有欲

落石是間一徑橫夾川萬松直樹從何時有陳公所手植陳公今焉在徑松自
寒碧昨宵望石峯相去無一尺今日行終朝祇繞石峯側石峯何曾遠江

路自不直仰瞻碧孱巖清峻如立壁反覆得細看何必更登陟後顧江已遠前

晚山若塞棹進岸自回天水未有極簾欣入絕巘舟愕觸潛石東瞰淡未熹北
吹寒更寂岸草不知愁向人弄晴碧

澄潭湧暗暈不風自成花回流如倦客出門復還家江晴已數日新漲沒舊沙
知是前溪雨濕雲尙橫斜

山轉江亦轉江行山亦行風鬟照玉鏡素練縈青屏我本山水客澹無軒冕情
塵中悔一來事外懷孤征忽乘滄浪舟仰高俯深清食翠復可飽飲淥身頓輕
鷗鷁不相識還作故園聲

危峯瑩無土平地岌孤石如何半巖間亦有小樹碧走空根苦辛倚險幹寒瘠
芳蘭間叢生紫蕤濯幽色近香許世聞遠秀絕人摘而我雲外身方茲喟行役
城中安得山無山安得詩我入五羊城遠與山水辭有鏡不敢覽塵面我自知
解纜來歸亭山水奔相隨水光動我巾山色染我衣舟行將一月恨速不恨遲
山雲來未已江月皎無滓

平聲

開懷放之入出語頗似之

我從靈州來惟見芳草渡蒹葭隨水遠曠野無立樹掛席上真陽好山忽無數

好山如隱士避世不自露不應官道旁仍有見山處借識衛叔玠未覩樂彥輔
石峯最難得舟過更回顧

南中山絕佳所恨人煙稀略無好事人結茅臨深溪峯頂可月亭岸石卽釣磯
空令煙中猿掛崖弄漣漪山多人自少人遠山益奇我舟行不留過眼山如馳
過眼意已足久留亦何爲

遠峯

孤巘秀何似碧蓮含未開誰將修月斧斲取一尖來

江上松徑

一日江行百折中回頭猶見夜來峯好山十里都如畫更與橫排一徑松

上濛瀼灘

清江斜抱嶺根來暗石衝波却倒回幸有瑠璃青一片落灘碎作雪花堆

回望摩舍那灘石峯

好山近看未爲奇遠看全勝近看時回望七峯雲外筍兩峯高絕五峯低

明發白沙灘聞布穀有感

提壺勸我飲杜鵑勸我歸不如布穀子勸我勤耘耔我少貧且賤不但無置錫
筆未墾紙田黑水導墨池借令字堪煮識字亦幾希啼飢如不聞飢慣自不啼
駿奔三十年辛勤竟何爲髮從道途白面爲風雪黧夜來白沙灘老命輕如絲
洪濤舞一葉呼天叫神祇生全乃偶然人力初何施曉聞布穀聲如在故山時
坐令萬感集初悟半世非一險靡不悔數悔庸何追有田不歸耕布穀真吾師

寄賀建康留守范參政端明二首

衰衣不是未教歸不合威名滿四夷天與中興開日月帝分萬乘半旌旗春生
錦繡山河早秋到江淮草木遲臥護北門朞月爾却專堂印鳳凰池
一生狂殺老猶狂只炷先生一瓣香不爲渠儂在廊廟無端將相更文章江南
海北三千里玉唾銀鈎十萬行早整乾坤早巖壑石湖風月剩分張

荔枝堂晝憩

荔子陰中風絕涼菖蒲節後日偏長落殘數柄荷花藥浸得一瓶泉水香多病

早衰非破硯欲行復倦且胡床曲江近北差遲暑不道江山勝五羊

風雨

殘風剩雨故欺人垂箔開窗護病身自拾荷花揩面汗新將筍簪製頭巾梅天
筆墨都生醜斐几文書懶拂塵帽子一峯青可掇隔牆不敢略開門

謝從善挽詞

一腹儲三篋雙鉤挽萬牛行身平中準閱世澹於秋紫誥猶新墨霜髯忽古邱
清風未作記掛劍淚川流

送彭元忠縣丞北歸

君從循州來却向饒州去拍天海浪拂日峯瓊尺裁成錦機句學詩初學陳後
山霜皮脫盡山骨寒近來別具一隻眼要踏唐人最上關三春弱柳三秋月半
溪清冰半峯雪只今六月無此物君能喚渠來入筆恰恰新鶯百轉聲忽有寒
蛩終夜鳴瀟湘故人江漢客爲君一夜頭盡白我欠天公詩債多霜髭撚盡未
償他君懷玉槃金叵羅合騎天駟超天河如何也鑄一大錯自古詩人多命薄

黃茅起煙如黃沙瘴母照水曼陀花廣東之遊樂復樂勸君不如早還家

題望韶亭

新隆寺後看韶石三三兩兩各依稀金坑津頭看韶石十五五不整齊一來
望韶亭上看九韶八音堆一案金鐘大鏞浮水涯玉瑟瑤琴倚天半亮時文物
也龕疎禮樂猶帶鴻荒餘茅茨殿上搥土鼓葦籥聲外無笙竽黃能郎君走川
嶽領取后夔搜禮樂嶧山桐樹半夜鳴泗水石頭清晝躍山祇川后爭獻珍姚
家制作初一新帝思南嶽來時巡宮琛廟寶皆駿奔曲江清澈碧瓊軟海山孤
尖翠屏展天顏有喜后夔知一奏雲韶供亞飯帝登九疑忘却歸不知斑斕湘
笛枝后夔一脰跛莫隨坐委衆樂江之湄儀鳳舞獸掃無跡獨留一梭守其側
至今喚作獅子石雨淋日炙爛不得洞庭張樂已莓苔犍爲獲磬亦塵埃不如
九韶故無恙戛擊尙可冬起雷何時九秋霜月裏來聽湘妃瑟聲美曲終道是
不見人江上數峯是誰子

憩楹塘驛二絕句

夾路黃茅與樹齊人行茅裏似山鷄長松不與遮西日却送清陰過隔溪
松鳴竹嘯響千崖爲底炎蒸吹不開自是簞輿趨北去薰風不是不南來

官道古松

翠旌綠纛夾車輪龍作長身銖作鱗莫笑道旁數松樹古來老却幾官人

病中止酒二首

葛衣著了却生寒風勢顛時正上灘客裏無聊已無奈更教止酒過春殘
江草江花怨阿誰山風山雨總成悲春愁萬斛無安頓旋旋分張乞小詩

行部決獄宿新隆寺觀鄒至完題壁

道卿千古一清風雪壁銀鈎墨尙濃若愛殿前蒼玉佩斷無身後碧紗籠

楊文節公詩集卷之十八

楊文節公詩集卷之十九

宋吉水楊萬里廷秀甫著

長陽後學彭 淑秋潭甫校訂

古筠後學李一球廣亭甫同校

南海集

南雄驛前雙柳

外計堂前柳絕奇南中無此兩渦絲午風不動休嫌暑要看枝枝自在垂

南雄解舟

一坐春江上水船卽非上水是登天如今下瀨江無水始信登天却易然

過建封寺下連魚灘二首

江收衆水赴單槽石壁當流鬪雪濤將取危舟飛過去黃頭郎只兩三篙

夢裏篙師忽叫灘老夫驚殺起來看前船過盡知無慮末後孤舟膽自寒

六月十八日立秋送客夜歸兩作

青天赤日更黃埃迎送紛紛正往來一夜炎蒸無計柰三更風雨領秋回人生

珍微宋版印
作麼禁寒暑世事何如付酒杯遮莫髯間點霜雪何曾筆硯減瓊瑰

送廣帥秩滿之官丹陽二首

北門臥護要耆英小試胸中十萬兵天借金山吟落月身兼鉄甕作長城何如
嶺上因歸路摘取梅酸去作羹已有紫泥教詣闕便應留住付鈞衡
南海元戎禁從臣却昇北斗捧星辰回頭五嶺忽千里屈指十賢添一人笑別
廣平堂下月歸看太極殿前春一尊話別端何有綠水青山更白雲

晚步

晚暑無涼可得尋小風一點慰人心斜陽碎入高榕葉翻作青瑤覆作金

寄題臨武知縣李子西公廨君子亭

王家喚竹作此君周家喚蓮作君子泥中懷玉避俗塵水上開花超大地紅裳
翠蓋映眼中欲往從之隔秋水牡丹貴人非吾徒籬菊隱士堪鄰居李侯岸巾
對芙蓉不寄新詩來起予

謝木輶之舍人分送講筵賜茶

吳綾縫囊染菊水蠻沙塗印題進字淳熙錫貢新水芽天珍誤落黃茅地故人
鸞渚紫薇郎金華講徹花草香宣賜龍焙第一綱殿上走趨明月璫御前啜罷
三危露滿袖香煙懷璧去歸來拈出兩蜿蜒雷電晦冥驚破柱北苑龍芽內樣
新銅圍銀範鑄瓊塵九天寶月霏五雲玉龍雙舞黃金鱗老夫平生愛煮茗十
年燒穿折脚鼎下山汲井得甘冷上山摘芽得苦梗何曾夢到龍遊窠何曾夢
吃龍芽茶故人分送玉川子春風來自玉皇家鍛圭椎壁調冰水烹龍庖鳳搜
肝髓石花紫笋可衙官赤印白泥牛走爾故人氣味茶樣清故人風骨茶樣明
開緘不但似見面叩之咳唾金石聲麴生勸人墮巾幘睡魔遣我拋書冊老夫
七椀病未能一啜猶堪坐秋夕

荔枝堂夕眺三首

夕峯褪日半鉦多秋漢吹雲一絮過寂寂庭松今兩月鶴雛去盡只留窠
病骨秋臞怯暮清涼風偷帶北風輕迎寒窗隔重糊遍只放書邊數眼明
閏年秋淺似秋深蟋蟀將愁傍砌吟今日初三元未覺西樓西角一鉤金

羅仲憲送薺菜謝以長句

學琴自有譜相鶴自有經
疏經我繙盡不見薺菜名
金華詩裏初相識玉友尊
前每相憶坐令芥孫薑子芽
一見風流俱避席取士取名多
失真向來許靖亦誤人君
不見鄭花不得半山句却
參魯直稱門生

曲江重陽

煙描水寫老秋容
嶺外秋容也自濃
如見大賓新露菊
若歌商頌曉風松
插花醉照濂溪井
吹髮慵登帽子峯
莫問明年衰與健
茱萸何處不相逢

九日郡中送白菊

未應白菊減于黃金作
鈿心玉作裳一夜西風開
瘦蕾兩年南海伴
重陽若言佳節如常日
爲底寒花分外香
揆藥浮杯莫多著一枝
留插鬢邊霜

擬題綿州推官廳六一堂

唐子西集載謝固爲綿州推官
推官之廨歐陽公生焉謝作六一堂求
子西賦詩云卽彼生處所館之與周旋
予謂此非子西得意句也輒擬